

Musa Mahu Wanita Umno Sabah Sokong Semua Calon BN Dalam Pilihan Raya Umum Ke-13
Bernama
30 September, 2012

KOTA KINABALU, 30 Sept (Bernama) -- Ketua Menteri Sabah Datuk Seri Musa Aman meminta semua pemimpin wanita Umno Sabah memberi sokongan penuh kepada calon Barisan Nasional (BN) pada pilihan raya umum akan datang, walaupun calon itu bukan dari Umno.

Beliau yang juga pengerusia BN negeri berkata ini bagi memastikan BN meraih kemenangan besar pada pilihan raya umum itu.

"Apa yang penting ialah semua kawasan yang ditandingi oleh calon BN menang. InsyaAllah kami mahu pastikan kemenangan besar untuk perdana menteri (Datuk Seri Najib Tun Razak) dan kerajaan BN," katanya berucap pada majlis pelancaran Program Salam Sayang Wanita Umno Sabah di Bangunan Umno, di sini, hari ini.

Pada pilihan raya umum lepas, BN hampir menyapu bersih 60 kerusi Dewan Undangan Negeri (DUN) dan 25 kerusi Parlimen dan hanya kalah kerusi DUN Sri Tanjung (Tawau) dan Parlimen Kota Kinabalu.

Musa berkata rakyat Sabah wajar memberi sokongan padu kepada kerajaan BN pimpinan Najib yang begitu bertanggungjawab dan prihatin terhadap keperluan rakyat.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=698546>